

# Jaorverslag VVDS 2016-2017

## Ut jaor van:

- Prins Han d'n Urste en zien Prinses Elma
- Jeugdprins Bart d'n Twedde en Jeugdprinses Kim de Urste
- Ut jaor van de neje pekskes van de Jeugd
- Ut jaor dat alles kapot ging
- Ut jaor van mök mök mök spurriemök mok spurrie spurriemök enzovoort
- Ut jaor van Witte Nie
- Ut jaor van unne duustere BBZ
- Ut jaor van stoppers die eigeluk nie stoppe
- Ut jaor dat d'r genne jeugdvorst mer was, of toch wel?
- En natuurluk ut jaor van wer un geslaagd vastelaovesseizoen

## Ut bestuur bestoond uut:

- Vurzitter Emiel Evers
- Vorst Jop Loonen
- Penningmèster Robert Steeghs
- Sik Rob Kunkeler

En de bestuursleje . . . Freek Smulders, Han van de Sande en Loek Arts

## De Raod van Elluf bestoond dit jaor uut:

Stef Claessens - Pascal Classens - Fred Peeters - Roel Steeghs, Marc Steeghs, Rowan Wijnhoven, Paul Geurts, Sander Peeters, Daan Willems, Marc van de Ven, Frank Steeghs, Wilbert Steeghs, William Steeghs

## En de dansmariekes ware:

Marloes Cox, Merel Foeken, Rianne Loonen en Melanie van Mil

## 11-11, de opening van ut seizoen:

Ut begos dit jaor bejna hiëlemaal zoëas gebruikeluk. De Prins was d'r, de raod was d'r, de vastelaovesvierders ware d'r, alliën Vorst Jop kos nie anwezig zien ien verband mit un brulluft. Dizze aovend was ut dus an Vurzitter Emiel um de honneurs waar te neme. Ut begos op ut dörpsplein, waar ut seizoen 2016-2017 geöpend wier dur de mök ien te zègene, mit ontzettend goed geluid. Prins Gerrit d'n Derde laas alle regels netjes vur, en goëide ut heilige mökkewater over ozze mök hin.

Dornao was ut binne te doen. Dit jaor gen neje raodsleje, wel iën nej bestuurslid: Loek Arts. Umdat ut toch unne Arts is wier ie ok zoë geprizientierd, unne Arts kan de vastelaovend ok bèter make, en as ge teveul pilskes op het kan hej ow ok wer genèze.

Naoderhand was ut nog tied vur unne Vastelaovesmuziekbingo, en hoewel alles toch redeluk goed was vurbereid haaj de organisatie gen rèkening gehalde mit ut feit dat misschien nie iederiën de nummers bej naam kende, dus duurde ut iets langer dan verwacht. Uteindeluk is ut toch allemaal goedgekomme, en de urste aovend van ut seizoen was toch wer geslaagd.

## 12-11: Ut Vorsteraodsbal

Dit velt altied op de urste zaoterdag nao 11-11, en was dizze kier wer daags dernao. Dit jaor ware we welkom ien ut Wiendbuuleriek van de Wanssumse Wiendbuul. Ondanks de felle tegenstand en kritiek op ut idee, zien we uiteindeluk toch mar mit de F... daorhin gegaon, aangezien ut nie zo wiet weg was. Ut was un mojje zaal mit un moj decor en alle vlagge van alle veriëniginge. Of ja, bijna allemaol.

Dit jaor begosse alle vorste op groëte hōgte, terwiel ze tiejes hun verhaal langzaam naor beneje zakte.

Vorst Jop zien weurd, die misschien ietskes lomp en boers aover kunne komme, wiere goed ontvange. Dit jaor was ut zellufs gefillemd en op facebook gezet. Helaas dat hej dat zellef nog steeds nie kan zien. Nao ut officieële gediēlte was ut tied vur de band Naachtwerk die nie zo goed snapte dat as ge fiēst wilt make, ge wel fiēstnummers mot blieve speule.

Gelukkig wier de aovend uiteindeluk nog gered dur de hovenierskwaliteite binne de raad van Elluf. Nao un hiēl antal uurkes en Lindeboom-pilskes ginge we wer mit zien alle naor huus.

### 13-11...

... Is un klēne delegatie van de Spurriemök nog naor de reseptie van de Wiendbuul gewist. De mēste han genne zin mer ien bier, wat vrej normaal is nao unne aovend Lindebocht.

Aangezien we ontzettend goed ware vurbereid het ozze Vorst van de P.A. ter platse un A4-tje gelend, daor un boëtje van gevouwe, 11 euro uut de knip gehald en derien gedaon, en dat was dan toch mar wer un ontzettend moj cadeau wat warschienluk nog steeds urges ien de medaillekast van de Wiendbuul hangt. As ge vergètèchtig ziet werde creatief, zulle we mar zegge.

### 31-12: Prinsraoje

Dit jaor op unne zaoterdag, umdat ut anders mit kerstmis, of 1 jannewarie mos. Uuteindeluk ware ut antal iengevulde lieste bekant net zoveul as andere jaore, dus ien dit geval was ut ga nie zonne ramp.

### 8 jannewarie 2017, de prinseproclamasie

Unne spannende dag vur hiēl veul meense. Ut begos zoëas altied ien d'n Terp, waor Prins Gerrit d'n Derde mos aftreje. Nao un woordje van Vorst Jop, den nog us anstipte dat Gerrit mar iēne kant het, nameluk de goeie, wier de proclamasie wer uitgereikt, mit vurnameluk mojje uitsprake. Dornaos was Prins Gerrit an de beurt um ziene lēste speech te gēve. Mar hej was ga nie van plan um te stoppe. Hej haaj un prinses geregeld, nameluk Moniek Willems, en hej woj gewoēn nog un jaor durgaon. Helaas mos de Vorst streng zien, en wier um toch al ut grei afgenome, zellufs d'n scepter (veuraf gegaon mit de woorde: Truu, halt dat ding us gauw ff). Daornaos het un klēne delegatie van de APK nog us kort unne hiēle hoēp uitsprake angehald, en wier Gerrit opgenome bej ut mojje clubke.

### Daornaos ien de Liende... um exact 11 minute over 3...

Kwame we d'r achter dat die verrekke klok ien de bestuurskamer stilstond op 10 vur 3.

Uiteraard snapt iederiēn dat ge bèter gen klok kunt hebbe dan iēn die stilstöt, dus het un niet nader te noeme persoon gezurregd dat die klok niemes mer vur de gek kos halde.

Dus ietskes latter as gepland wier de buhne dan toch geopend, en kwaam ut decor van de vastelaovestrein tevurschien, mit trouwes un wēl werkende klok. De wēke daorvur haaj ien ut krēntje un verhaal gestaon over de vorst den mit ziene vastelaovestrein dur Oeldere raasde, en op dit verhaal wier durgeborduurd. Verschillende meense kwame uut den trein mit echt werkende deure, en zellefs sommige meense liepe d'n trein ien. Zellefs opa Flodder was anwezig. Hiēl efkes leek ut nog mis te gaon, al huurde dat d'r misschien ok wel bej, mar nao de 11 regels kwaam uut de mojje deure: Prins Han d'n Urste mit zien Prinses Elma. Hej deuj ziene urste speech ien ut

bejna Oelders, en sloot af mit ziene liefspreuk: Watter ok gebeurt, altied blieve lachen, ut kumt altied wer goed, witte nie?

Nao unne groëte polonaise was ut moment angebroke dat de jeugd uut zeuj komme. Dit jaor was dat extra spannend, want ze ware allemaol ien neje pekskes gestoke, en bejna niemes wis al hoe die deruut zage. Naodat un iengehuurd model de alde pekskes nog iëne kier liet zien, was ut dan echt tied vur de presentasie, en as un echte modeshow wier de neje outfit van de jeugd getoënd.

Daornao was ut spannende moment angebroke, wie wiere de neje jeugdprins en jeugdprinses? Naodat alle vraoge beantwoord ware kwame ze naor buute, Jeugdprins Bart II en Jeugdprinses Kim I, en ok dees ware allebei hiëlemaol ien ut nej gestoke. Naodat ze allebej gespeeched han, en iederiën wis dat Vorst Jop gen hullep mer haaj mit werke tiejes de carnavalsdaag, en prinses Kim um nog probierde te hellepe dur zien nummer dur te gève as ge wel tied hat um mit te werreke, was ut ok tied vur unne groëte polonaise dur de zaal.

Dornao wier ut decor afgebroke, en wier d'r nog un moj fiëst gebouwd ien de zaal. 's Aoves was ut eier ète bej de prins, waar ut hartstikke druk was. En ondanks dat ozze prins ut hartstikke duk gezeet het: Witte nie; was dat wel de kleur van de eier die daor te ète ware.

Daornao nog naor de Terp, waar onder anderen prins Han nog un liedje het gezonge.

### **21 jannewarie: Ut Ald Wieverbal**

Bijna twië wèke latter was ut tied vur ut fiëst der fiëste. Dit jaor han we un band die nog nie zo hiël bekend was, nameluk: Sjanté. Ze ware nog nie zo bekend ien Oeldere, mar bliekbaar wel ien de rest van Nederland. Vanuut ut hiële land kwaame studente spesjaal vur hun naor ut Oelderse land. Vanaf ut begin tot ut end was ut un groët fiëst.

Nao ut Ald Wieverbal ginge we naor ut Studente clubhuus, oftewel bej Marc vd Ven thuus. Terwiel wej rustig zate te ète, kregewe wej van ozze sik via de app unne mojje documentaire wat ge allemaol tege komt as ge ien plats van via de wèg, dwars dur de mökke ien de wei hin lopt.

### **22 jannewarie: Afferden**

Dizze zondag is un klène delegatie mit de prins naor un receptie ien Afferden gewist. Gelukkig won ze unne hoëp rotzooi hebbe as cadeau, en ut was un moj fiëst, zoëas ge op de foto's wel kunt zien. Ut is helaas nie gelukt um de stamtoffel van de raad van elluf daor mit naor buute te neme. En dizze middag is dan ok de basis geleet vur un nummer wat we nog duk zun gaon huure...

### **3 en 4 fibrewarie ware de Bonte Aovende**

Dees aovende ware wederom vurnameluk gevuld dur artieste van eige bojjem, en ok de Joekskapel was twië aovende os eige De Mok is Los. De aovende ware qua programma nie gans utzellefde, mar dat moog de pret nie drukke. De opening wier verzurregd dur de vorst.

Toen iederiën plats haaj genome was ut tied vur de urste artiest: De Soul Teens van Dansgroep de Soul Community. Dees dames liete unne mojje dans zien, te wiëte Lonne, Danique, Merel, Celine, Fleur, Bib, Lianne, Imke, Nikki, Emma en Nienke.

Dornao was ut tied vur unne buut. Mies Willemsen kwaam as Dokter ADHD de buhne op en vertelde wat hej zoäl mit makt as arts. Zien grappe viele goed ien de smaak, en wej hope dat dit zeker nie ziene lèste kier op de buhne is.

Dornao kwaam un clubke vrollie op de buhne die us won laote zien dat zej minstes net zoveul ien hun mars han as hun kels: De ex-prinsesse van de Spurriemök. Zej han un leuk stuk mit van alles wat: Toniël, Durpspolitiek, en zellefs zang. De helleft stook d'r mit kop zonder schouders bovvenuut, de andere helleft liet de handjes flink wappere, en dit ware Angelique, Annemarie, Jessie, Liset, Maria, Marloes, Monique, Petra, Rianne, Willy en Wilma, en unne gastrol van Ex prins Gerrit den zurregde vur de kalde frikandelle.

As vierde ware Kardinaal Josias en Zuster Maria an de beurt. Zej vertelde over ut reile en zeile binne de kerk, en hoe modern ze daar tiggeworrig ware, terwiel ze langzaam ien de zuvvende hiëmel belande. Zellefs Prins Han is nog efkes op de biecht gewist. Hiël moj gedaon dur Jos en Ingrid.

Daornao kwame de dansmarietjes Rian, Mel, Merel en Marloes de buhne op. Zej hebbe 6 minute lang bejna de lange uut hun lief gedanst, mit unne heuse dansmarietjes dans, of hoe ge zoiets ok noemt. Veul gehuurde reactie: Verrek! Kunne die dat ok? Hiël moj gedaon dames.

Nao de pauze waar we dizze kier ok nog brudjes knak kosse ète, was ut tied vur de APK. Dees hiere hebbe unne mojje miniplaybackshow nergezet, waarbej de hiële zaal mitdeuj en mitklapte. Wej wisse tot dusver ok nie dat d'r zuveul talent bej dees here zoot. Moj gedaon dur: Marco, Martien, Pieter, Pieter, Theo, They, Theo, Ton, Ron, Giel, Vincent, Jos en Jan.

Nao de APK was ut tied um uut te ruste. Althans, dat was vurnameluk wat de twië here Joop en Ewald dun, ze werreke nameluk op ut gemèn tehuus waar mier bakke koffie as druppels zwiët geproduceerd werre. Mit veul humor en soms wat durdènkertjes hebbe John en Emiel ok wer un moj stuk nergezet.

Dornao kwame de dames van Glossy hunne dansact doen. Iën van de aovende was ut bijna unne privé dans vur de meense op de buhne geworre, aangezien d'r hiël efkes nie an gedocht was um de gordiene ope te trekke. Mar nao unne herstart kwaam alles toch nog goed. Unne mojje dans gedaon dur: Moniek, Lianne, Ilse, Eline, Jessie, Inge, en Maud die op twië nao allemaol Closses of Classes van achter hiete.

Daornao kwaam "Trio Niks Geloge"..... die han ok un stuk.

En toen dat afgeloëpe was, was ut tied vur un stukske stress, vurnameluk vur de Bonte Aovend Vurzitter Sander. Ien ieder geval de zaoterdag. Want normaal gesproke metiën nao de iën nao lèste act begint de lèste. Proefonderviendeluk zien wej d'r achter gekomme dat dat wel lastig is as den lèste act nog urges tusse Deurne en Helmond rejt. Dus toen was ut tied vur un stukske improvisatie. Glossy deuj nog un toegift. De Mök is Los speulde nog un paar nummers, de Vorst deuj nog iën gedichtje en wat flauwekul, en uiteindeluk, toen was de lèste act ok gearrivierd: Dik Knipscheer de Gienekeloog, oftewel Rob van Elst. Hej haaj un hiël verhaal over wat hej zoäl mitmiek as Gienekeloog, vurnameluk over dinge waar nie over gepraot moog werre ien verband mit privacy.

De aovend was daornao afgeloëpe. Nog iëne kier allemaol de buhne op, althans naodat alle zwiët van de lèste buutreedner was opgedweild, en toen zate d'r wer twië geslaagde aovende op. Naoderhand ien d'n Terp wier d'r nog dur un paar raodsleje nog gekeke wie ut hardste ut bier via un PVC-piep bej d'n andere ien de waffel kos blaoze. Wie d'r krek gewonne het wet eik niemes mer, en is ok ga nie interessant.

## **5 fibbrewarie**

Dizze dag was de Jeugd Bonte Middag. Un bomvol programma, mit as cirremoniemèster Britt Kusters, die as boerinneke tusse ut wèrk dur de stukke an en afkondigde, mit urre leus: Ik bin Britt, un boerin mit pit! Ut was unne gezellige middag, mit dans, toniël, unne moppentapper, unne goochelact, teveul um op te noeme, en natuurluk ok de rooie Ritas onder leiding van Fred Piëters.

**10 fibbrewarie** zien we mit de club naor Circus Mök gewist. En net as we dènke dat ut nie mer slechter kos... Bleek dat ok zoë te zien. Ze han wat veranderd ien ut programma, waordur alle stukke ien mekaar aover liepe, en d'r mar hiël wennig tussendur gealdehoerd wier. D'r zate iets mier leuke stukke tusse as vurrig jaor, dus al mit al vonde wej dat ze toch wel wat verbèterd han. Uiteraard zien wej nog steeds van mènning dat ge ien Oeldere veul mier kriegt, vur veul minder geld. Ut fiëst was nie mer ien de foyer, mar ien de neje zaal, wat eigeluk mar iën doffe ellende was. Ondergetèkende mos nameluk 2 minute loëpe en 2 trappe af um buute te kunne gaon roëke.

Nao ut fiëst, wat gelukkig nog wel un beetje op gang kwaam naodat ze urst de Finale van ut LVK hebbe uitgezonde, is nog un groëte delegasie efkes bej de fiëstaovend van de Motorclub angeschove.

**11 fibbrewarie** was de krantverkoëp. Ok dit jaor lit d'r wer unne hiële mojje krant, dit jaor ien de vurm van unne reisgids. Hej is moj uitgereikt an Prins Han, Jeugdprins Bart en Jeugdprinses Kim. De commissie het ut ok dit jaor wer hartstikke goed gedaon.

Ansluutend was ok de opening van Expeditie Mök. De organisatie het ut hiële jaor geoeffend, en dizze kier kwaam d'r ien iëne kier unne flinke knal uut de melkbus. Toen de urste tip binne kwaam was ut de twië daaropvolgende wëke wer zuuke geblaoze naor de Expeditie Mök - Mök.

**12 fibbrewarie:** De Prinsereceptie.

De middag wier zoëas gebruukeluk geopend dur de Muziekveriëning en ut woordje van de durpsraad. Daornao slote vriende, familie, kennisse, collega's, teamgenote, en nog veul mier meense an um ut Prinsepaar en ut jeugdduo te fillicitiere.

Tussendur was d'r nog un kort intermezzo dur ut bestuur van de Vorstenraad. We han twië jubilerende raodsleje ien os midde, nameluk Stef Claessens en Jop Loonen. Zej wiere kort kort toegesproke dur Vurzitter Willie Konings, en daornao wier bej hun allebej de orde van de Vorstenraad opgespeld. Vur de vrollie was d'r uiteraard un moj bluumke.

Daornao ging de receptie wer gewoën dur, totdat hej officieel afgeslote wier dur de speeches van de hoëghede. Jeugdprins Bart en Jeugdprinses Kim liete hier ok hunne eige hit "Fiëst mar mit" huure. De middag wier verder muzikaal opgeluusterd dur "Kroom dur den Bocht" uut Luëne.

Toen ut ien de Liende klaor was hebbe we mit zien alle wer opgeruimd, en zien we nog ien d'n Terp beland um d'r daar nog iëne te drinke.

**17 fibbrewarie:** zien we mit un flinke delegasie naor ut Câsselse Aldwieverbal gewist. Dizze aovend traad Trademark hier op. Genne carnavalsmuziek, mar un welkome afwisseling. En net toen we langzaamaan wat minder zin begosse te kriege ien bier, wiere alle anwezige prinse naor baove geroepe vur unne 7-dronk, oftewel ien 1 liedje 7 pils naor binne haksele. En ik wiët nie waar hej ze het gelaote, mar hej het ze opgedronke, en binne gehalde.

**18 fibbrewarie** was de derde edisie van de Oelderse Kôst. Ut was dit jaor ietskes minder druk, mar de boeremoes mit worst smiek d'r zeker nie minder um, en ut was ok zeker nie minder gezellig. De middag wier muzikaal opgeluusterd dur Wil Peters, en vur un stukske vermaak kosse we luustere naor un leuk stuk van Joop en Ewald, oftewel John en Emiel. Wej hope dat d'r zeker nie minder meense naor dizze gezellige middag gaon komme, want ut zien twië hartstikke mojje uurkes.

**19 fibbrewarie** zien we alwer ien Câssele gewist, dizze kier vur de jeugdreceptie, waar de Jeugd nog efkes gespeched het, en unne zak mit mökkerepe het angeboje. En Jeugdprinses Kim het hier gen groëte, mar wel un belangerieke bódschap op de WC achter gelaote.

Naoderhand hebbe we ekkes gegète bej d'n Terp, en toen naor Deurne, waar un zakerelatie van Prins Han ok prins was geworre. Daor gève ze alles weg, bier, medailles, en groëte viltjes. Nao unne gezellige aovend zien we d'r nog iëne gaon drinke ien d'n Terp, as afsluuting van ut weekend.

### **23 fibrewarie: Carnaval bej de SJMO**

Toen we nao ruim 20 minute eindeluk binne moge hebbe we daar nog un klèn half uurke mit gefiëst. Dit jaor stonde d'r DJ's en die dun ut hartstikke goed.

### **24 fibrewarie: Schólcarnaval**

Dit jaor was ut wer ien Oeldere, warschienluk dat de raad van Câssele daorum op ut lèste moment pas an kwaam kakke. Outgeroepe tot schólprins en prinses ware Thymo en Janne. We begosse mit de optocht, den d'r hartstikke moj uutzag. Dornao ien de Liende ging ut fiëst van start. D'r wier gehost, polonaises geloëpe, en alle hoofdpersoëne van beide veriëninge wiere uutgenuëdigd um an verschillende spellekes mit te doen. De middag wier groëtendiëls opgeluusterd dur un joekskapel. Ut was wer unne gezellige middag, en un mojje vurbereiding op de echte vastelaovend. Naoderhand ien d'n Terp hebbe wej d'r nog iëne weggeève.

### **'s Aoves was ut ziekebezuuk**

Prins Han en Prinses Elma zien same mit Vorst Jop op bezuuk gewist bej Marielle Zanders, die urre enkel verzouwd haaj mit ut zuuke naor de mök. Gelukkig ware wej as rivaliserende Mökzuukers toch gewoën welkom, sterker nog, ze vond ut hiël leuk dat wej nève kwaame.

Daornao is dees delegatie nog efkes naor de Liende gewist, waar Wim Michels un koninklukke onderschejjing kreeg uutgereikt.

**Carnavalszaoterdag 25 fibrewarie...** nou ging ut echt beginne. Vur de liefhebber was d'r ut Groët Vastelaovesontbijt ien de soos um 7 uur. Normaal hedde alliën witte of bruune eier, mar bej de soos kriege ze ut verrig um ok zwarte eier te bakke. Althans, zoë zien ze d'r naoderhand uut. D'r is nie bekend of iemes ze geprobierd het, ozze Prins Han het ze ien ieder geval laote staon.

Dornao was ut tied vur un bezuuk an ut klènste mökske. Dit jaor han wej bepaald dat dat Mees was van Marc en Sanne Thoonen. Zej wisse nie dat wej mar mit un paar man kwaame, dus hebbe wej as toetje op ut ontbijt nog 3 beschuut mit muuskes de man gekrege. Daornao het prins Han zien boorkunste laote zien en ut klènste mökske ien d'n tuin gezet.

Ansluutend mosse we metiën dur naor de installasie ien Rooy. Dit jaor was dat ok nie mer ien de groëte zaal ien de schouwburg, mar ien de neje zaal. En dat was moj vol, iederiën kos binne, d'r was alliën 1 probleem: Iederiën ien de zaal mos staon en kreeg dan ok nog niks te drinke. Ut programma was wel ietskes iengekort, dus ietskes minder lang. Dit jaor moog prins Han ziene liefspreuk zellef dur de microfoon hin kwèke, en kreeg ie unne neje sleutel overhandigd. Naoderhand zien we nog ekkes blieve hange bej d'n tap.

Dornao zien we naor ut Iensjekke gegaon, en op tied wer naor huus, want ut eige programma begos alwer op tied, mit um 7 uur de mis, waar ut nie zo gek druk was.

Dornao ut Expeditie Mökkebal. Daor stond de band Tonca, die we al us oëit dukker han gezien. Ien de pauze was de opening dur Prins Han, mit ut tradisionele medaille ophange ien de kast, en daornao metiën de priesuuttreiking van ut Expeditie Mökkebal. De pries vur de mojste foto/film ging naor Farmhunters. De groëte winnaars van dees vierde edisie van Expeditie mök is gewonne dur: De Terpmökke.

Net vurd dat de band wer begos was d'r nog un spesjaal optreje. Ozze Prins Han en Prinses Elma hebbe un nummer geschreve, en dat ginge ze nou vur ut urst ten gehuure brenge. En dat was ut begin van hiël duk mök mok mok spurrie mok mok spurrie mok mok mok enzovoort. Daornao was ut wer an de band, en die hebbe d'r un hiël moj fiëst van gemakt mit de zaal. Op ut end nog un lekker (bruun) eike ète, en toen zaat d'n urste dag d'r alwer op.

### **Carnavalszondag 26 fibbrewarie**

Dizze dag begint mit ut ophale van de Hoëghede, en dit jaar kosse die ongevèr nie wier uuterén ligge. Durrum hebbe we unne anhangere geregeld vur de Mök is Los, en verder iederiën op de wage. Urst naor Jeugdprins Bart gereje, opgelaie, dornao naor Jeugdprinses Kim, en toen naor Prins Han en Prinses Elma. En moj op tied stonde we dan klaor vur d'n optocht. Dizze verliep wederom vlekkeloos, en uiteindeluk is de buurt van Prins Han mit de urste pries d'r vandur gegaon.

Ozze neje carnavalswage is ok goed getest. En ondanks dat hej goed op en neer schudde is bejna alles gewoën blieve hange. We hebbe getest of de geluidsboxe d'r tege kunne as ze gruwelk hard op en neer rammele. En we hebbe getest of de beschermhoeze ok nog hiël blieve as ge ze tigge de uutlaot van ut aggregaat an zet. Ok hebbe we getest of d'n motor van de drèjende aap d'r tege kan as hej an stöt mar nog geblokkierd is. Ut antwoord hierop is bej allemaol nieje.

's Middags was ut kienderbal waar dur Jeugdprins Bart en Jeugdprinses Kim de jeugdcarneval hebbe geopend, en dit liep wer as unne trein. De muziek wier wer verzurregd dur dj Ruud en Eric. Wat latter op de middag zien de bejde jubilerende raodsleje ok nog unne kier naor baove geroepe. Vorst Jop deuj un woordje over Stef, en toen noom Emiel ut aover en deuj un woordje over Jop. Bejde kregen ze un hiële mojje onderscheiding, Stef de orde van de Bronze Spurriemök, en Jop de orde van de Zilveren Spurriemök. En ok de dames kregen wer unne mojje bos bloeme.

's Aoves wer efkes naor de soos, nog unne kier speeche vur de jeugd, en daornao ien den Terp ut Mökkebal, waar ut ok wer tameluk rustig was, ondanks den ontzettend goeie DJ. Uut betrouwbare bronnen heb ik ok vernome dat Thej Willems ut ok ontzettend gezellig haaj gehad, en fijn mit de fiets naor huus is gegaon. Ik heb d'r zellef gen verstand van, mar ik begreep dat hej mit afstappe ien plats van zien vuut, zien gezicht an de grond het gezet.

### **Carnavalsmaondag, 27 fibbrewarie**

Dizze dag begos zoëas altied mit ut snotneuzebal, wat ok wer hiël leuk was vur de allerkleinste. En uiteindeluk ware ze ok wer hiël blie mit de ballonne.

Daornao was de optocht ien Venroj. Wej stonde wer moj veuraan. Iederiën deuj hiël enthousiast mit, en Prins Han het zellefs zien liedje nog unne kier gezonge. De jeugd haaj speciaal t-shirts mitgenome vur hun favoriete nummer: Shirt uut en zwaie. Ut zaag d'r schitterend uut. Ok de muziek was unne kier ge-update. Dat vonde wej wel leuk. De carnavalswage nie. Want as d'r hiël veul gespronge wert kriegt zo'n ding ut nogal te verdure. Tot waar vroeger ut Upke zaat ging ut nog redeluk, mar toen begos ut. Veur op de wage begosse un paar koppe langzaam steeds legger te hange. Aachter op de wage vonde de mökke ut ok wel moj gewist, en broke van de wage af. En hoe wier we rejde, hoe mier onbekende onderdiële deraf viele. Mit un paar man stonde we baove en begosse we langzaam os af te vraoge of we nie op unne Jenga-tore stonde: Wannier stort ie ien?

Nao de optocht wer terug naor de Liende waar de Kiender wer de baas ware, alliën han ze vandaag vrej. D'r wier nog un spelleke gedaon, en uiteindeluk han alle kiender gewonne. Ut wier nog un moj fiëstje. 's Aoves wer ekkes naor de soos, en daornao wer Mökkebal ien den Terp, waar ut gezellig druk was, wer mit unne Super DJ.

### **Carnavalsdinsdag, 28 fibbrewarie**

De lèste dag van de vastelaovend begos wer ien d'n Terp mit de brunch, verzurregd dur Gerrit en Paula. Naoderhand was d'r vur hun twië natuurluk wer un mojje onderscheiding en zellefs unne bos bloeme vur Paula.

Daornao mit zien alle naor de Liende vur de BBZ. Dit programma begos precies op tied. De iëne nao de andere act kwaam ut podium op. En toen gebeurde ut. Midde ien ut optreje van P en P wier ut ienèns duuster. Hiël snel ware we d'r achter dat de stroëm nie alliën ien de Liende weg was, mar ongevèr ien hiël Oeldere. En toen kwame wej d'r mit zien alle Live achter dat ge echt van os

raad van Elluf op an kunt. Un paar man zette de deure ope vur ventilatie. Un paar andere rolde vest de kabels uut naor alle belangerieke punte waar stroëm mos komme. Andere viete hun instrument en ginge mit de Mök is Los de zaal entertaine, terwiel wer andere de zaal anzwengelde. En terwiel Fredje zèj: Ik dènk nie dat we ut aggregaat zoëmar mit kriege, ging de roldeur bej Gommans ope, kwaam Roel mit d'n heftruk naor buute gejage, mit Jan Gommans an den tillefoon: "Ej, ik neem ut aggregaat effe mit woh". DJ Schuufke het ondertusse snel zien grei opgebouwd vur de muziek, en zoë kwaam ut dat we nao 35 minute wer an de geng ware, mit licht, geluid, en kald bier. Ut programma is wel wat umgegooid, en ut het allemaol wat langer geduurd, mar eigeluk hebbe we gewoën un hallef uur pauze gehad. Dit hiële gedoe haaj natuurluk wel iën naodiël. De ganse raad van Elluf is hierdur nameluk de hiële tekst van hun nummer vergète, dus mos d'r geïmprovisierd werre. Uuteindeluk was ut toch wer unne geslaagde BBZ.

Daornao nog efkes fiëste mit DJ Schuufke, en toen was ut al wer snel tied vur de afsluuting van de jeugd. En ok daar gebeurde iets nejs. Jeugdvorst Pascal noom efkes ut woord, en het ut jeugd duo un heuse proclamatie cadeau gedaon. Ze hebbe ut zellef vurgelèze, mit nog un klène quiz: Zuur regel 6. Nao ut afsluute mit de jeugd was d'n Terp alwer druk an ut bakke en braoje, en was ut goed mistig ien de hiële zaal.

Toen ut afgeloëpe was ien de Liende, ging de jeugd naor de soos, en de rest naor d'n Terp. Rond 10 uur was ut tied vur ut mök verbrande van de jeugd. Nog iëne kier speeche, de medaille ien de soos ophange, en mit zien alle naor buute vur ut verbrande van de mök. De carnaval was vur de jeugd nou toch echt vurbej.

Terug ien d'n Terp was ut rond hallef 12 tied vur de afsluuting. As urste nome Rob en Rowan plats op ut biljart. Zej han angegove nao dit seizoen te stoppe. Mar! Umdat ut bestuur d'r lucht van haaj gekrege dat ze toch nog twiefelde, zien zej de maandagmiddag es um de toffel gaon zitte, mit as resultaat dat ze uuteindeluk gewoën dur gaon. Dus snel van ut biljart af, en toen was ut tied vur de echt stoppende raodsleje, oftewel, zoëas Stef ut noemt, Raodsleje MIT ruggegraot. Freek was d'r iëne van, en hej kreeg vur zien verdienste unne orde van de bronze Spurriemök. Teuntje op ur beurt kreeg unne mojje bos bloeme.

Stef moog ok vur den derde en lèste kier naor veur komme, en hej kreeg nog un kort weurdje van de vorst, en Marianne kreeg urre derde bos bloeme van dizze carnaval.

En de dansmarietjes han ok alle 4 angegove nao dit seizoen d'r mit te stoppe. MAR! Ut scheen dat d'r wer iën opvolgster was, mar die woj dat dan ok wer nie alliën doen. Dus het Marloes beslote um toch dur te gaon, same mit Steffie Steeghs. De andere 3 dansmarietjes krege nog un dankwoordje van Vorst Jop, en ok vur de dames was d'r nog unne mojje bos bloeme. Vur Rianne was dit ok de derde van dizze vastelaovend. Paul vond ut nie ierluk dat hej genne bos bloeme kreeg as anhang van un stoppend dansmarieke.

Daornao moge Prins Han en Prinses Elma op ut biljart gaon zitte. Nao un kort woordje van de Vorst was ut tied vur ziene lèste speech van dizze vastelaovend. De speech duurde tot net nao twelluf uur, en dus wier d'r nog efkes gezonge vur Vorst Jop den toen jurrig was. En ut urste verjurdagscadeautje kreeg hij van de prins, iets mit "Boks uut en zwaaië".

Toen zien we mit zien alle naor buute gegaon, waar de Prins en Prinses de versiersele af wiere genome, de mök ien de fik ging, en nog un verkorte versie van de receptie gehalde wier. Ut fiëst daornao was ok èrg gezellig, en niemes wet hoe laat hej naor huus is gegaon, umdat uuteindeluk, ien ut seizoen dat d'r vanalles kapot ging, de klok ien d'n terp ok nog us van de muur af viel.

**Dit was ut jaorverslag 2016-2017**